

# 'Centro Man Na Obra' contento cu nan amigonan di Okkernoot di Hulanda



ORANJESTAD(AAN): Diabierna **DIARIO** a entrevista cabesante di Centro Man na Obra señora Elvira Tromp, relaciona cu bishita di 'Okkernoot' di Hulanda, cu ta un fundacion cu tambe ta traha cu clientenan cu incapacidad intelectual.

Segun sra Tromp, algun aña pasa empleadonan di Okkernoot a bishita Aruba hunto cu algun di nan clientenan y nan a busca contacto cu Centro Man na Obra, pa nan haya un tour di e lugar.

Atravez di e 'rondleiding' aki e prome contacto a wordo hasi y December aña pasa Okkernoot a manda un mensahe pa Centro Man na Obra, puntrando si nan lo por bolbe bishita e Centro cu algun di e clientenan di Hulanda.

Awor nan a yega Aruba y Centro Man na Obra a




prepara un presentacion cultural special pa nan amigonan Hulandes. E clientenan di Man na Obra

cu ayudo cu studiantenan di EPI a train hopi duro y a logra trece un bunita presentacion Diabierna.



# Tremendo presentacion di Man na Obra y Okkernoot

bunita intercambio cultural a tuma lugar



ORANJESTAD(AAN):  
Diabierna na Centro Man na Obra tabata tin un dia special pa nan clientenan. Nan a ricibi bishita di centro 'Okkernoot' di Hulanda, cu mescos cu Man na Obra, tambe ta hasi un trabao grandi y importante cu personanan cu incapacidad intelectual. Man na Obra a ricibi un

donacion di 600 Euro for di Okkernoot y durante di e festividad e clientenan di Man na Obra a hasi un presentacion special pa nan amigonan di Hulanda. E clientenan a prepara un baile Carnavalesco y a muestra nan amigonan Hulandes cu ta balia durante Carnaval aki na Aruba.

Ora cu nan presentacion a termina, nan a lanta tur e clientenan como tambe e bishitantenan di Hulanda, pa nan balia hunto. Despues di esaki, e grupo di habitante di Okkernoot tambe a hasi un tremendo presentacion di 'Line Dancing', despues di cual un biaha mas tur hende a balia hunto.



# Okkernoot di Hulanda, cu donacion pa Centro , Man Na Obra



ORANJESTAD(AAN): Diabierna DIARIO a bishita Centro Man na Obra, unda cu tabata tin un dia special prepara pa e clientenan. DIARIO a entrevista Corrie de Jonge di 'Woonvoorziening de Okkernoot', cu ta un fundacion Hulandes cu ta traha cu hendenan cu un incapacidad intelectual.

El a conta cu 3 aña pasa 5 cliente di Okkernoot a bay riba un vakantie pa Aruba y asina a lanta e idea pa organiza un biaha atrobe pa nos isla.

Mirando cu e empleado y clientenan di Okkernoot a haya e bon bini y trato di parti di Man na Obra asina caluroso, nan a bin cu e idea di hasi algo pa e centro na Aruba.

E Consejo di Cliente (clientenraad) di Okkernoot conhuntamente cu un grupo di baile di 'Country Line Dance' tambe di Okkernoot a organiza un evento, cu ayudo tambe di un organizacion di musica pa hendenan cu un incapacidad intelectual, pa asina recauda fondo pa yuda



Centro man na Obra.

E clientenan na Hulanda a balia, hasi musica y a bende rifa y asina famia y amigonan a bay na e evento y en total a logra recauda 600 Euro pa Centro Man na Obra.

Esaki a wordo entrega oficialmente Diabierna merdia na cabesante di Man na Obra Elvira Tromp.

Juffrouw de Jonge a conta DIARIO cu el a keda hopi impresiona y encanta cu e trato cu nan a ricibi for di e empleado y clientenan di Centro Man na Obra.

El a bisa cu na Hulanda tin diferente tipo di subsidio pa nan por hasi e tipo di viahenan aki cu e clientenan y e ta spera cu un dia esaki lo por wordo hasi pa e personanan cu incapacidad intelectual di Aruba.

**TELEFONNAN  
DI DIARIO  
582-6747  
FAX  
582-8551**